

## तीतसलाई पावलए परींद ओयो चिथी

आव चिथी तीतसलाई पावलए परींद ओयो ज़। तीतस पावलस सिप सिप दुलिद परमेस्वरए ओपाँ सथैज्याव मिँ ओल्यो। पावलए नोलाई 'गेभाइ ज़' (२ कोरिन्थी २:१३), 'डास सिप येन दोज्याव डानै ज़' (८:२३), सोनो 'परमेस्वरए ओपाँत उयुँ हुबो साचो डाज़ा ज़' (तीतस १:४) है ओदोज्याव। पावलए नोलाई क्रेत तापुत माखेमो नियेनर खेम्न्या सोनो मन्दलीलाव लोम्बार खतैन्याए जूँनी ख्यानैक्यो (१:५)। है जैद आव चिथी धुतनी पैज्यावराए ल्योनी जोगोइन्त्या (१:१०-१६) सोनो परमेस्वरए ओपाँत बाज्यावर किताव ताव उपरिज्याव पैन्याए जूँनी (२:१-३:२) परींदिक्यो।

1 डा पावल, परमेस्वरए ओबाँदा, परमेस्वरए ओराछाँतिउरालाई साचो पाँलाई थरैद्याद ओल उयुँलाव मितावर जैन्याए जूँनी येसु ख्रीसए ओसाची खतैसिउ डालिज्या। 2 ननी ज़ परमेस्वरए डादाकिन ज़ 'अजम्बरी जुनी डाराएरिज्या' है ओरादोवदा यार्युँ थू जैरिज्यार। है जैद खर्क ज़ धुत मापाँज्याव परमेस्वरए, 3 ओल ओगोइँव बेलाक ज़ नो ओपाँ भरी सतैक्यो। डा फरी नो पाँ सथैन्यात ओल गेलाई बाँचैज्याव परमेस्वरए है ओदाँवनी ज़ डाताके।

4 नँ डास सिप परमेस्वरए ओपाँत नयुँ हुबो साचो डाज़ा तीतसलाई आव चिथी परींद डाईज्या। नल्योदा परमेस्वर गेबाबु सोनो गेलाई बाँचैज्याव येसु ख्रीसनी नियुँ ओगराँक, नयुँ ब होलाँ जैद उईनिक।

### मन्दलीलाव लोम्बार

5 डा नँलाई क्रेत तापुताव माखेमो गिनयेनर खेम्न्याए जूँनी सोनो नाखार नाखारल मन्दलीलाव लोम्बार खतैन्याए जूँनी डाख्यानैनिके। हो बेलाकाव है डादींव मिताव, 6 नो लोम्बार

नराजैक याखत माल्योर, याज्या ब नेज्या माल्योर, याजार ब परमेस्वरए ओपांत हुव यामन लागिउदा माबाद याबाबुलाई खिउर ओतारक। 7 नो लोम्बा ताव मिं परमेस्वरए ओयेन दान्या ओतावए कान्त ज्ञ ओपां:च्या माल्यो ताव परिके। है जैद नो मिं एकोहोर्यासो, हतपूत उरिस चोन्या, मद छोकोरात डमो, इसिन्या, प्राइंत लोभ दान्या, निताव ओपां:च्या ल्यो ताताक। 8 बुरू नो मिं पाहुनार समारिन्या, चाव बानी खिमन्या, ओतहस ल्यो, प्राइंत ज्ञ सतस दाज्याव, थंरिउ युं ल्यो, परमेस्वरए उयुंलाव मिताव ओताक। 9 नो मिंए ओपैसिउ मिताव युं हुबो परमेस्वरए ओपां माबिरैद, नो पांणी ज्ञ छुतरालाई यासा हाइद्याधुन्या, धुतनी पैज्यावरालाई यागलती थरैद्याद यापां वैंधुन्या ब ओताक।

### फातैज्यावरास जोगोइसिन्या

10 नल साचो पांकिन तंदा जैसिज्यावर कुधु ज्ञ लिज्यार। नोराए यापां अनाकलाव ससैसिउ ओतावए मिंरालाई फातैन्या वाज्ज लिज्या। इन प्राइरानी फातैज्यावर नो क्यालन्या सरेस 'माजैसिद माताए' है लिज्यावर ज्ञ लिज्यार। 11 नितावराए यापां वैंधाव ताके। नोराए पैसाए लोभए माचाहिउ पांर वै वै जैद तोबो झिमलावरालाई ब याराफातैज्यार। 12 नो क्रेतलाव उमिन थासो जैसीए ब, "आव गेपोलाव मिंर छुलें पुलें दाज्यावर, छे छे डम्सिउ धुइर्यासोर, येन मादाद ज्ञान्या हाम्पातीर वाज्ज लिज्यार," है लिद ले। 13 नोए है उलिज्याव मिताव साचो ज्ञ लिज्या। है जैद नं तीतस नलाव मिंरालाई बनै ज्ञ हपूकैद परमेस्वरए ओपांत थंरिउ जैव ताके। 14 परमेस्वरए साचो ओपांकिन तंदाडावराए याससैव अनाकलाव यापां सोनो यहूदीराए यासिजैज्याव आगल्या पांदा यायुं ताझा:रक। 15 परमेस्वरए ल्योनी यायुं छेंव मिंरालाई प्राइं चोखो ज्ञ लिज्या। परमेस्वरए ओपांत यायुं माहुबो यायुं माछेंवरालाई ते चोखो

काता ज़ माले। याबुद्धी भरी ब छैंव काता ज़ माताद कपूतें वाज़ लिज़्या। 16 यायाःए ते 'परमेस्वरलाई गेसरेसूज़्या' है ल्यो जैसिज़्यार, यायेननी ते परमेस्वरलाई यामासरेसूज़्याव ज़ रैंःजूया। नोर परमेस्वरए ओपाँ माभैंःद युँ माजामो काम मालागिउर ज़ ताज़्यार।

## 2

परमेस्वरए ओपाँस खैन्या येन

1नँ भन्या थंरिउ पाँलाई ओज़्यासूज़्याव मितावनी पैव ताके। 2 सेरो मिरँ माचावदा माङ्मोर, यामान नैद्यान्या सूयासोर, यातहस ल्योर, परमेस्वरए ओपाँत थंरिउर, नैं मेंए ल्योदा युँ थू जैद प्राइँ सहिन्या ताव परिके लिद यासम्जैयो।

3हो मिताव ज़ जूचासोर ब यादोज़्याव येन भरित याधर्म रैंःवर ओतारक। अर्काए उछीनी मापाँन्यार, मद छोकोरात माङ्मोर, छुतलाई चाव येन सिऊधुन्यार ओतारक। 4 नोराए भर्जाकाव मेंमारालाई ब यारेरास खैन्या, याज़ारालाई पाथस नैन्या ओरासिऊरक। 5 हो वाज़ माःक, नो धामें मेंमार यातहस ल्योर, यारेराए सतत ल्योर, याज़िम चावस चलैन्यार, यायुँ गराँवर, यारेराए पाँ धूँल ल्योर ओतारक। हो ताकिन ची परमेस्वरए ओपाँत पाँःच्या हुन्या माले।

6हिताव ज़ भर्जाकाव खेपार ब प्राइँत ज़ यातहस ल्योर ओतारक।

7नँ फरी नोराए याङ्काक चाव येन दान्यात सतैद नैसिउ मिताव तानी। परमेस्वरए ओपाँलाई बरेःसी न्निन्या माजैद, माबिरैद ज़ लाँव ताके।

8 नपाँ भरी थंरिउ, कान्त ज़ ओखत माल्यो ओताक। हो ताकिन ची गेकिन तँदाडावराए गेक्याँत काता खत ज़ मादैद याज़ थाम थुम तान्या लेर।

9फरी नँ नो बाँदा लिज़्यावरालाई है यादोयो, नोर यासाहुराए पाँ धूँल लिद मारूम्रूमैद यासाहुराए युँलाव मिताव येन दान्या ओतारक।

10 यासाहुराए मीं काता ज़ माछापूद यादोज़्याव भरित सतस दान्यार ओरैःरक। निताव यायेनए गेलाई बाँचैज्याव परमेस्वरए ओपाँए ओसोभा हाइघान्या लेर।

परमेस्वरए ओअसिक

11 परमेस्वरए गेल्योदा उयुँ गरॉद अजम्बरी जुनील बान्या प्राइँ मिराए गेजूनी रैःद ले। 12 परमेस्वरए निताव ओअसिक गेक्याँत उहुवए गे परमेस्वरकिन तँदाडाव गेमन लागिउ येन भरी रासूद, आव पापी जुकल तहस लिद परमेस्वरए उयुँलाव मिताव चाव येन दान्यादा गेयुँ थू जैद गेसिऊसिज़्या। 13 सोनो माहान गेपरमेस्वर, गेलाई बाँचैज्याव येसु ख्रीसए ओज़गै मगैस ओमाहुवा पै आस दाद ओयेम चिऊव ज़ गेनैज़्या। 14 नो गेप्रभु येसु ख्रीसए गेलाई पापनी हाइद ओल छैव उमीर सोनो ओयेनत युँ थू जैन्यार जैन्याए जूनी उजिउ झाःघासिक्यो।

15 नँ आव है डादीव पाँर पैद परमेस्वरए ल्योनी नदैव हकनी ख्वारालाई यासम्जैयो, ख्वारालाई यासिडार्यो। सुए ज़ नपाँ सज़िम्द तार्इरक।

### 3

परमेस्वरए उयुँ यालो

1 है जैद नलावर सरकारए ओकानुन चलैन्या हक दैवराए याधुँल लिद मुइलिउर ताद प्राइँलाई तान्या येन ओदोरक लिद यासम्जैयो। 2 सुए ज़ अर्काए उमिन बलेद ताएरक। सुस ज़ माइसिद प्राइँस सहिसिद यायुँ इयासोर ओतारक। 3 गे ब इादा काता ज़ मासैन्यार परमेस्वरए ओपाँ माभैःद तँदा बावर गेल्यो। गे जोत ब गेयुँ मानैधुद गेमन लागिउ येनर दाद गेजिउ भरी अर्काए उमीं चाव रैःद मी तून्या, सोसिन्या, हेला रैःसिन्या वाज़ गेदोज़्याव। 4 हैदी ब गेलाई बाँचैज्याव परमेस्वरए गेलाई उयुँ ओनाव उयुँ ओगराँव सतैद

ओयासिउ बेलाक ज़, <sup>5</sup> अजम्बरी जुनील बान्या जैसिक्यो। निताव ओजैसिउ गे गेकमैव धर्मए माःक। ओल परमेस्वरए उयुं गरॉद छैव उपुरूसए गेलाई सछेंद साःरोल ओजमैसिउनी वाज़ गेताके। <sup>6</sup> नो उपुरूस गेलाई बांचैज्याव येसु स्त्रीसए ल्योनी परींघासिक्यो। ननी ज़ गेक्याँत ओअसिकर ब धोल पोगोल ज़ ताजूया। <sup>7</sup> है जैद गेल्योदा परमेस्वरए उयुं ओगरॉवनी ओड़ाक उयुंलाव मितावर गेतावए अजम्बरी जुनीदा गेयुं थू गेजैज्या।

### साचो थ०रिउ पाँत लिन्या

<sup>8</sup> आव डासरो भरी साचो पाँ ज़ लिज़्या। है जैद नँ नोरालाई पुर्यस सम्जैव ताके। हो ताकिन ची परमेस्वरए ओपाँत हुवर चाव येनत कलँ लिन्या लेर। आव पाँर गेजूनी थ०रिउ चाव ज़ लिज़्या। <sup>9</sup> गे अनाकलाव पाँर, खरडाव मरडाव काता काताराए मिनर सोनो मोसाए ओकानुनलाव पाँरानी खर्लेसिन्यारानी अछतड ल्यो ताके। आव भरी अनाकलाव याचाहित माल्योर वाज़ लिज़्यार। <sup>10</sup> निताव पाँरानी फातैज्याव मिँलाई तखेप नेखेप पै सम्जैव ताके। है जैद ब ओमाताकिन नोलाई रासूद नैव ताके। <sup>11</sup> निताव मिँए उयुं बिप्यानी ताःसिउ ओतावए मादान्या वाज़ दाद ओलनी ज़ पापी थ०रिजूया।

### तुपैन्या पाँर

<sup>12</sup> डास लिज़्यावनी अर्तिमास सोनो तुखिकसनिलाई नल्योदा तोबो डानिपरींरिजूया। नो मिँ उहुव प्राइँना नधुकिन डास निकोपोलिसल दैसिहुव ताके। डा युँदा भरी नल ज़ डालिरिजूया। <sup>13</sup> सरकारी वकिल जेनास सोनो अपोल्लोसनिलाई माथैव मायोःवल सघैद चावस निपरींयो। <sup>14</sup> नलाव गेसकाव मिँराए ब निताव माथैव मायोःवलाई सघैन्या चाव येन ओपैसिरक। परमेस्वरए ओयेनत काम मालागिउर तातारक।

<sup>15</sup> डास लिज़्यावराए प्राइँए जेरो है दींज्यार। नल्योडाव लिज़्याव गेलाई मया दाजूयाव यायुं हुबोरालाई जेरो है यादोयो।

तीतस 3:15

6

तीतस 3:15

जे प्राइँए ल्योदा परमेस्वरए उयुँ ओय्याल्क।

**सा:रो बाचा**

Kham, Western Parbate: सा:रो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

---

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd